

IN FVNERE  
**R O B E R T I**  
 CARD. BELLARMINI  
 O R A T I O  
*TARQVINII GALLVTII SABINI*  
*è Societate Iesu.*

Habita Romæ. in Templo domus Professæ eius-  
 dem Societatis. Idib. Octob. Ann. MDCXXI.

ILLVSTRISSIMO PRINCIPI

ODOARDO CARD. FARNESIO  
 DICATA.



ROMAE, Ex typographia Alexandri Zannetti. MDCXXI.  
 SVPERIORVM PERMISSV.


TECA HAZ  
 1617  
 1717

*Imprimatur, si videbitur Reuerendiss. P. Mag. Sacr.  
Palat. Apost.*

*P. Episcopus de Curte Vicefg.*



*Imprimatur, Fr. Greg. Donatus Magist. & Soc. Reu.  
P. Fr. Hyacinthi Petronij Magist. Sacr. Palat. Apost.  
Ord. Præd.*





*ciae meae facile veniam dabis, quam, ut conie-*  
*cturis assequor, ipse mihi è beatorum domicilio*  
*tribuit Bellarminus. Respuisset ille quidem vi-*  
*uens hoc laudum suarum acroama, quod alio-*  
*qui mortalibus est ita iucundum: sed nunc,*  
*cum tam pium prohibere non potest officium, si*  
*consuli possit mortuus, responderet haud dubie,*  
*placere sibi virtutum suarum ornamenta tibi po-*  
*tissimum offerri, ac dedicari, cui præcipuum*  
*ipse semper honorem habuit, cui libellum de cæ-*  
*lesti felicitate pulcherrimum inscripsit, cui etiam*  
*paulo ante obitum se debere professus est pluri-*  
*imum. Hauserat hanc ille à maioribus suis hæ-*  
*reditariam observantiam erga nomen istud, do-*  
*musque Farnesiam, egregiorum altricem ho-*  
*minum, virtutisque bonorum apertam semper,*  
*et hospitalem. ex ea quippe cum alijs longè*  
*plurimis, qui vel sacram Senatus augustissi-*  
*mi purpuram, vel summum Christianæ rei prin-*  
*cipatum adepti sunt, ille quoque Marcellus olim*  
*prodiit, quem Bellarminus et avunculum ha-*  
*buit à genere, et virtutum suarum idoneum,*  
*quod imitaretur, exemplar est nactus. Hunc*  
*inquam aduersus Farnesiam gentem acceperat à*  
*suis*

suis quasi translaticium amorem, ac reuerentiam: sed nominatim erga promeritum, ac virtutem tuam sic erat affectus, ut qui faceret omnia temperatè, in te uno diligendo, observandoque modum habere non videretur. Et recepit quidem à te parem benevolentis significationem, ac gratiam; cum tu præter ceteros insignem hominis doctrinam, & sanctimoniam admiratus, non modo verbis amplissimis cum semper ornaveris, sed eiusdem quoque in actu vitæ postremo res gestas singulas, ac pronunciata designari, notarique scripto volueris, quæ tibi proponeres ad imitandum. Quin id quoque meritò gloriaris; quòd tu, supremo loco ab eodem consecratus Episcopus, eorum clauferis agmen & numerum, qui tantam in eo genere sunt adepti felicitatem. Est enim animo periucundum, à sanctissimis, ac celebratissimis viris eiusmodi munus accipere, quod sacrum nihilo minus esset ac sanctum, quamquam nobis à gregarijs, & communi sanctitudine præditis hominibus impartiretur. Utinam patereur iustæ modus orationis, hinc à me percenseri omnia, quæ de Bellarmini sanctitate spectabili cupis agnoscere. simul enim obsequerer

animo tuo. simul satisfacere votis orbis terrarum,  
 qui præclarum hoc virtutum omnium speculum  
 vehementer expeſcit. Sed explēbunt hoc munus  
 alij, qui vitam hominis enucleatè perſcrutabun-  
 tur omnem, quæque ſapienter ab eo, ac recte  
 facta ſunt opera, diligenter, accurateque perſe-  
 quentur. Incrimuliffime Princeps hæc  
 pauca deliba, & à me, atque à tota Sodalitate  
 noſtra, quam impendū ſpes, vale plurimum, ac  
 ſalue: teque Chriſtianæ Reipublicæ  
 ornamento & commodo diu-  
 turnum atq; incolu-  
 mem præſta.



ORA-

# ORATIO.



AGNVM è Collegio Purpuratorum superioribus hisce diebus extulimus hominem : magnum sanè parentem , ac patronum amissimus : magnum ipsa religio custodem luget , ac defenlorem : magnum , vt semel dicam , mihi video propositum argumentum , ROBERTVM BELLARMINVM Cardinalem , Tutorem , Præsidentem , Consiliarium , Senatorem Christianæ Reipublicæ magnum . Mentiuntur haud dubiè , ac sæpe mortalibus imponunt Mathematici quidam dolosa Chaldæorum instituti disciplina , qui diuinare se putant , ac futura prædicere : nec quisquam paulo sapientior est , qui genus hoc hominum , vt dixit ille , consulentibus infidum , sperantibus fallax , qui malitiosam hanc artem commentis , & mendacijs illaqueantem plurimos , vetari legibus semper , semperq; retineri non conqueratur . Mirantur tamen aliqui , cur ex fallaci doctrina responsa quædam fortuita sanè , atque inconstantia , sed euentum interdum . habentia , vulgoque probata proficiscantur ; tum præsertim , cum totius anni futuras belli , pacisque vicissitudines , aëris salubritatem , aut luem , annonæ pretium , pecudum valetudinem , aut morbos , hominum interitus , & funera ex astrorum notatione generatim , vniuersæque significant . Quam profectò nonnullis admirationem in hunc Bellarmi decessum curiosius , quàm par esset intuentibus , mouit nuper istorum aliquis , qui pronunciare non dubitauerat , hoc anno vertente magnum è

viuis esse demigraturum Antistitem. Excitaret adeo  
 plurimorum expectationem illa prædictio, perquirentium,  
 ecquis ea magni nominis appellatione designaretur ad  
 obitum. Sed confestim ambigua suspitione liberauit eo-  
 rum animos exemptus è mortalium numero Bellarminus:  
 cuius tanta magnitudo nominis est, vt hunc demum esse  
 putauerint, cuius exitus è vita fortuitò fuisset, & casu de-  
 nunciatus. Mihi quidem neque prædictum harioli, neque  
 vulgi simplex ista probatur, & credula natio: verumtamen  
 ex illa interpretatione prorsus intelligo, id omnes existi-  
 masse, idq; me posse probantibus vniuersis, ac iure contem-  
 dere, Magni cognomentum multo fane magis in purpu-  
 ratum hunc Antistitem cadere debere, quàm in eos, qui  
 olim à magnitudine rerum gestarum illum sibi titulum in-  
 uenerunt. Eum enim verè magnum dici posse, atq; hoc  
 nomen in eo tantummodo poni debere crediderim, in  
 quo virtus illa deprehendatur, quæ quoniam humano fa-  
 stigio superior esse videtur, ac maior, ab officiorum præ-  
 ceptoribus appellatur Heroica. hæc autem non vna est  
 militaris illa fortitudo, quam poëta immanibus etiam, &  
 truculentis hominibus interdum attribuunt; sed ipsius  
 quoque temperantiæ, mansuetudinis, ac modestiæ, singu-  
 larum deniq; virtutum apex, & extremitas vltima præcla-  
 ro illo nomine cohonestatur. Nullis adeo virtutis Heroicæ  
 legibus inhibemur, quo minus hunc sacri Senatus mode-  
 ratissimum, ac modestissimum Patrem dicere magnum ex-  
 cellenti nomine debeamus; cum ipsis quoq; lenioribus  
 congruere virtutibus nomen illud Heroicum possit, si cum  
 gradum eminentem, supremamq; determinationem attingant,  
 quæ non tam in homines conuenire videatur, quàm  
 in aliquos omni humano captu, atq; ingenio celsiores.  
 Quamquam ne illius quidem fortitudinis, cui solum He-  
 roicum nomen imperitia poëtarum impartit, si minus ex-  
 pressam



pressam vim, certe similitudinem aliquam in hoc homine prorsus, omninoque desiderabimus, si eius inueniri scripta illa voluerimus, quorum impressione bellum Christianæ Reipublicæ perduellibus acerrimum fecit, facietque quoad litteræ loquentur, & monumenta stabunt, quoad erit humanum genus, quoad ipsa rerum vniuersitas communi populorum omnium rogo, ac tumulo conflagrabit. Statuarum se poëta Pindarus esse gloriatur, & dicit artificem: non tamen ea signa cælare, ac facere, quæ vel temporum, hominumue iniuriæ sint obnoxia, vel motu careant, ac vita, vel sua semper in basi, & loculamento consistant; sed carmina condere statuis meliora, quæ terras, ac maria peruagentur, quæ victorum coronas toto terrarum orbe circumferant, quæ nullis sint, aut bellorum, aut temporum, aut aliarum calamitatum procellis, ac tempestatibus opportuna. Glorietur hic etiam noster, ea se composuisse, ac reliquisse posteritati armanienta doctrinæ, quorum beneficio, ac vi, non in vna, vel altera terrarum ora, non vno, vel altero tempore, sed ubiq; ac continenter implacabile bellum cum desertoribus olim gesserit, geretq; semper in posterum, vita quidem functus, ac spiritu cassus, at in monumentis illis æternùm spirans, atq; ob rem pro Christiana religione felicissimè gestam, ipsa nominis immortalitate superstes. Sed vt planius, explicatiuſq; propositum attingam, ac ea, quæ de doctrina dicenda esse arbitror, in loco dicam, ac separatim, ita statuo: in Bellarmino, quem iure magnum appellari debere contendimus Antistitem, magnam oppidò fuisse sapientiam, magnam religionem, ac pietatem, magnam rerum humanarum cōtempTIONem, temperantiam, mansuetudinem, modestiam, ac moderationem, ceteras denique virtutes huiusmodi faciliores etiam magnas; hoc est eas, quæ communibus egressæ fini-

bus, humanum vicisse modum, mensuramq; mortalitatis omnem superasse videantur. Et quoniam doctrinæ splendor eximius in hoc primo vestibulo confestim occurrit, huius ego ductum aduersitoris vltro, ac libentissimè sequar, qui & clarissimam præferet ceteris virtutibus in itinere facem, & Heroicam in hoc homine laudem esse multo facillimè demonstrabit.

Ex honestis, bonisq; maioribus in vrbe Politiana, quod norunt vniuersi, Bellarminus est natus: quibus vt ipse continuo moribus, ac pietate respondere studuerit singulis, multo se tamen similiorem exhibuit auunculo suo Marcello Ceruino Pontifici Maximo, religiosissimo, doctissimo, ac prudentissimo viro, quem Christianus orbis tanquam è cælo per machinam in hoc Theatrum extemplo demissum effusè gratulatus est, ex eodem repente subductum vehementer indoluit. Anno ætatis sextodécimo nõdum exacto, humanarum pertæsus, atq; affectus fastidio rerum, Sodalitatem hanc nostram infantem adhuc, & prope crescentem in cunis precibus expetijt in finis: sed cum à patre ad explorandam animi constantiam in quodam, vico Ceruinorum attineretur, præterquam quod, operi futuro præludens, ad paganos de Deo, deque Christiani hominis officio concionabatur assiduè, in consanguineorum etiam æqualium Academia, vbi alium alij scriptorem explicabant, orationem ipse pro Milone Ciceronis egregiam, atque vt antiquorum aliqui loquuntur, orationum Reginam ausus est illa ætate puer interpretari. quo tempore, vt eius quoque facultatis, in qua mirabili modo iuuentutis prodere se solet ingenium, & amœnitas animi, specimen aliquod daret, carmen fundere cœpit, & bonum, & multiplex. nam cum alia multa latina, populariq; lingua poemata fecit, tum vnum, quod primum fuit, de virginitate præclarum, & eclogam, elegiamq; de Ro-  
ber-

9  
 bertii Nobilij Cardinalis obitu longè pulcherrimas; quæ  
 in hominum honesta corona pronuntiata, non modo cum  
 acclamatione sunt exceptæ, verum etiam auditæ cum la-  
 crymis. Cum hac indole post aliquod tempus hanc So-  
 dalitatem ingressus, illico cœpit inter excellentia inge-  
 niorum lumina, quibus etiâ tum efflorescebat hic cœtus,  
 ita præfulgere, vt philosophicis tantum imbutus artibus,  
 necdum sacris initiatus, simul ad domesticos de virtutum  
 cultu stans ex more diebus verba faceret, simul humanio-  
 res in Gymnasio doceret litteras, simul sacras explicaret  
 in templo, tanta cum approbatione, quantam ne ipsi qui-  
 dem veterani promerebantur. In quo munere cum Monti  
 Regali Cispadanorum vrbi præclarum initio nauasset ope-  
 ram, Florentiæ deinde, ac Patauij, tum denique Venetijs,  
 in Vrbe domina, prima nostrorum hominum iam inde ab  
 initio Societatis altrice summam consecutus est laudem:  
 vbi eum nobilissimi, disertissimiq; Senatores, quorum illa  
 Respublica florentissima, & singulari sapientia regitur, &  
 abundat numero, non cum admiratione solum audiuerunt  
 è loco superiore dicentem, verum etiam ad extremum  
 opera perfunctum sua, & discedentem exosculari cum pie-  
 tate voluerunt. Paucissimi quidem fuere, sed tamen fue-  
 runt aliqui ad militaria studia sic facti, vt exercitus antè  
 duxerint, & copias, quàm aut in tirocinio fuerint, aut in-  
 ter gregarios stipendia fecerint: id quod nominatim con-  
 tigiſſe Lucullo ferunt; qui propter incredibilem ingenij  
 magnitudinem subito ingressus est imperator in Asiam,  
 cum fuisset rei bellicæ rudis ex Vrbe profectus. Sed quod  
 in re militari tam rarum exemplum est, id ego video in  
 omni doctrinæ laude Bellarmino adolescenti singulariter  
 esse concessum. vt enim Augustinus omnium illa genera-  
 rerum, obscurissimo ab Aristotele stylo descripta, nullo  
 magistro præcunte percepit, sic ipse difficillimas quasdâ

A 5

grauif-

grauiſſimasque docere aggreſſus artes , optimus repente  
 magiſter apparuit earum rerum, quarum , aut nunquam ,  
 aut certè vix fuiſſet ante diſcipulus . Miſſus in Belgium  
 eſt necdum Theologiæ cognitione penitus inſtitutus in  
 ſchola, nec vllis inſtructus Ordinibus ex ijs, qui Sacerdo-  
 tio præparant viam ; ita proſus, vt neceſſe habuerit Lec-  
 dij minores omnes, & è maioribus, ac ſacris vnum accipe-  
 re, reliquis autem Gandavi à Cornelio illo Ianſenio, cu-  
 ius in Euangelio laus , & perfectæ lucubratio eſt, aliquan-  
 do fuerit inſignitus . Et tamen illa ætate iuuenis , ac ti-  
 ro ſacrarum interea monumenta litterarum latina con-  
 cione Louanij ſic interpretabatur in templis , in exedra  
 Theologiam, excellentem illam, diuinamq; ſcientiam ita  
 docebat, vt clamoribus vndique factis, ad eum audient-  
 dum vtriuſque rei cauſa ab innumerabili multitudine  
 cum pugillaribus, & palimpeſtis ex tota prouincia con-  
 curreretur . Hic videlicet, vbi nouitiuſ præceptor inter  
 imperatoria munera tam egregia rudimenta ponebat, me-  
 ditari cœpit bellum, quod poſtea, & indixit animosè, &  
 ſuſcepit ardentè, & promouit conſtanter, & bona de-  
 mum ex parte proſtigauit aduerſus Eccleſiæ tranſugas ,  
 quibus in toto terrarum orbe vix habet alios hoſtes Chri-  
 ſtiana religio capitaliores . Vagabantur multis ſane lo-  
 cis, & Chriſti fundum, regnumq; vaſtabant hæc mon-  
 ſtra, ferocitate formidoloſa, veneno peſtifera, numero  
 infinita . Repebant humi quædam, mordebantque præ-  
 tereuntes, quaſi dracones, & colubri per inſidias: alia  
 volutabantur in cœno, nec extra popinas, & ganeas  
 egrediebantur . alia velut Harpyiæ quædam Angelorum  
 illum panem, & Regum delicias conabantur inſicere:  
 alia tamquam tauri cornibus, pedibusque aras, ac Cæli-  
 tum imagines euertebant: alia Regibus, ac Dynaſtis in-  
 ſenſa ſanguine reſpergebant vrbes, templa, fora, loca  
 omnia

II

omnia vulneribus, ac eade cruentabant. Singula denique separatim ipsa per se monstra erant immania, communiter, & coniunctim Hydram componere videbantur, cuius vulnera periculosiora essent, & fecundiora, quam sanitas. Non tamen est tanto labore, periculoq; deteritus hic Imperator: sed comparata sibi disciplinarum, litterarum, linguarumq; omnium copia tanta, quantam ne multi quidem simul homines assequi possent, classicum cecinit illud, quo tamquam leonis rugitu perterrefactæ minores belluæ, ad meditandum effugium intra latibula, se condiderunt. Bezæ quippe coryphaei, atque antesignani repentino veluti fulmine percussus à Genevæ gurgustio demum audita vox est, vi quadam diuina, & quasi machina veritatis extorta; cum primo illo controuersiarum inspecto volumine, ubi de Pontificis auctoritate differitur, exclamare coactus est; hic liber enim verò nos perdidit. Eosdem alij quoque clamores emiserunt, ac lacrymas, impendioq; cogitare coeperunt, qua ratione ruinæ possent occurrere, quam suis imminere ceruicibus intu ebantur. Confestim in Britannia certum excitauere suggestum, sedemq; constituerunt à cæteris seiunctam, & propriam, ex qua refelleretur accuratè, ac sedulò Bellarminus. hoc enim confutato, putabant arcem omnem Catholicæ religionis amoliri se posse; quemadmodum eorum vnus scriptis ad virum primum hisce litteris haud dubie significauit. gaudere se, quòd Bellarmini vulgata, essent opera, quorum lectione planissimè demum, certissimèq; posset intelligi, quid in vnaquaque de religione controuersia Romanæ vindices Ecclesiæ censerent, quæue medulla esset Pontificij dogmatis intima, quæ non magis in ipso Pontifice, quàm in Iesuitis (sic enim ipse loquitur) esse crederetur. Infelicem, & eum, quem omnino merebatur exitum, nata est tam insolens, ac putida

diligentia : cum ex ea schola permulti de suo iam dubitantes errore, plurimi quoque mutato planè consilio, atq; ad veritatem conuersi quotidie digrederentur. Intellexerunt adeò, frustra se demum conari clauam illam infringere, quam Hercules haberet in manu : & iam tota Britannia in eos, qui curiosè, obseruateq; meditabundi cernuntur in via, commune quasi prouerbum dicitur ; de Bellarmino refellendo, tamquam de Atlantico mari per cotylam exorbendo cogitare. Quin ita sibi persuaferant omnes ; Bellarminum statura procera, humanumq; supra modum eminenti præditum fuisse natura ; nec ijs habebant fidem, qui testabantur, hominem se Romæ, alibiq; vidisse non ita magnū, ac paruo potius instructum corporis habitu, quàm excelsio. Neque enim fieri posse putabant, vt prægrandi quoque statura, & corpore non esset ille, qui animo, ac doctrina fuisset contra Gigantes istos, Titanasq; Centimanus. In summa, veritatis ineluctabilis est vis, frustra q; testes adornantur aduersus conscientia iudicium, quod corrumpi, deprauariq; non potest. Nam cum omni lapide commoto, efficere se non posse cernerent, vt vel captiõibus, ac præstigijs, vel fictis etiam fabulis huius hominis eleuarent existimationem, imminuerent famam, coeperunt eundem ipsi quoq; mirificè prædicare, verbisq; ac re illum plurimi pendere, quem aspernari sine sua vituperatione non possent. Bataui quippe, sicuti nuper accepimus, in sua ipsorum publica bibliotheca Bellarminum vel primum esse volunt, vel collocant inter primos : & alij, qui aduersus eum scribere tamen aliquid audent, communem reueriti populorum opinionem, eundem ita commendant, vt nos ad hominem exornandum Oratores haud alios, quàm vituperatores istos querere debeamus. Placet istorum verba, quoniam hostium testimonia sunt, de scripto pene, ac de volumine recitare.

*Magnum*

*Magnum* : inquit eorum aliquis (Cæcilium illum alloquens Angliæ Quæstorem) *magnum nomen Bellarminus : de quo homine cum meam opinionem quæreres, respondi ut sensi, me illum iudicare virum sanè doctum, ingenio felici, iudicio subtili, lectione multiplici præditum ; qui soleret etiam apertius, ac simplicius agere, quàm ceteri, argumentum pressius urgere, atque ad causam arctius adbare-scere : cumque legisset omnes argumentationes, responso-nesq; selegit quas iudicaret esse neruosiores. Arduum sane opus, exclamat alius, Bellarmini quæstiones illas infinitas in certa volumina relatas, admiramur, arduum opus: quod exigit scientiam prope infinitam, non modo variarum disciplinarum, & linguarum, sed etiam totius antiquitatis, omnium historiarum, ac temporum. multa isto in opere, atque instituto veluti pilatas acies agmine facto oportet homini occurrissè, cum in tantis rebus, argumentisque scientiam adeo multiplicem desiderari putauerit, ut hereticos non vnus generis, sed varia variorum examina vna acie prosterneret. Auditis elogium inimico profectum ex ore, ac veritatem apertissima confessione de mendacio triumphantem? euerlos se, prostratosque profitentur. sed ne solidum victori concedere gaudium videantur, & sepythones isti, comminuto iam capite, cauda tamen, ac reliquo corpore commoueant, in huius partem laudis, ac gloriæ collegas etiam vocant, quorum auxilio Bellarminus illa tam ardua monumenta perfecit. non enim inducere possunt animum, opus ita spissum, tantisque difficultatibus impeditum vnus labore hominis, ac studio confici, expeditiq; potuisse. Scio equidem hoc commentum iugulatum esse nuperrimè viri doctissimi oratione, ac stylo, qui & codices ex Romani Collegij bibliotheca produxit autographos Bellarmini manu perscriptos, & verè, sanctèque testatus est, hominem se vidisse cum quæstio-*

nes illas exararet, non modo nullis adhibitis eius laboris, operæq; consortibus, sed ne amanuensibus quidem, aut exceptoribus accersitis. addam tamen etiam ego symbolam meam, & istos, qui suo iudicio errare, ac decipi volunt, inuitos sanè, repugnantisque omni prorsus errore liberabo.

Est his, qui Bellarmini laborem, & gloriam cum alijs communicatam volunt, ingenium, ut credo, mediocre, memoria fortasse non mala; doctrina, quæ supra litteraturam non attollatur, studium haud multum, comestationes, computationesq; creberrimæ, impietas in Cælites, in homines arrogantia non ferenda: quibus cum moribus diuina se conciliare sapientia non potest, quæ modestis, ac bonis viris gratiam dare, superbis, elatisq; se resistere profitetur. Bellarmino fuit ingenium singulare, ordine lucido perspicax, versatile, factum ad omnia; memoria, ut semel dicam, pene diuina, quæ quicquid legeret, scriberetque statim, ac subito reciperet, quicquid recepisset, fidelissimè, constantissimèq; retineret. fuit studium ita pertinax, et tam insatiabile, ut, non dico diem sine linea, sed ne momentum quidem temporis elabi sine operæ pretio pateretur; temperantia verò incredibilis, vigiliæ plurimæ, pietas, animique demissio disciplinarum studio maior. Vultis igitur acutissimi Silones ex me discere quid causæ sit, cur ille aduersum vos, hoc est aduersus impietatem sine socijs, auxilijsque scribere potuerit opus, quod tam multa librarijs aera meretur, quod in sola Germania vigesimam habet editionem, quod immortalitatem sibi iure pollicetur, quod cum fieret, multorum, ut dicitis, & creditis ipsi, defatigauit ingenium; vos autem collato studio, longoque post tempore librum proferatis in lucem, vel non magnum, vel quantumuis magnum certe non bonum, & qui vix natus exarescat, Principum edicto proscriptus,



ptus, atque obliterated incendio? vultis inquam id ex me nosse? possum enim hoc vobis oraculum faciliè reddere, totumq; Sibyllæ folium vno verbo recitare. Cum vos in viola decumbebatis, & pluma, ille vigilans, ac pro religione velut excubias agens, in rerum diuinarum, humanarumque contemplatione versabatur. Cum vos in voluptatibus eratis, & procuratione corporis, ille temperantia, ieiunioque oblectans animum, vel in Patrum sanctissimorum legendis, euoluendisq; monumentis erat totus, vel feriatu à studio cum Superis colloquebatur, & Deo. cum vestris vos innixi viribus, & ingenio stylum in Ecclesiam, hoc est in Christi corpus armabatis, ille sibi diffusus, ac doctrinæ suæ, tela præparabat, quæ regereret in aduersarios, pia plus precatione, quàm lubricationibus, & vigilijs, plus modestia, quàm minis, plus commodorum omnium despicientia, quàm rerum copia, communitus.

Sed hæc nimirum illæ virtutes sunt, quas in Bellarmino fuisse summas huius orationis initio dixi. pergam igitur, atque à doctrina gradum faciam ad ea, quæ cum illa, singulari scientia vinculo prorsus admirabili, ac perdifficili copulatione coniunxit. Quàm enim arduum sit, leniores quasdam, mansuetioresq; virtutes doctrinæ præstabilis, & rerum omnium cognitioni subnectere, scimus omnes, qui litterarum aliquo colore leuiter aspersi, necesse habemus assiduè spiritus, atque animos premere, hoc est cauere, ne nobis ipsis sapientes nos esse videamur ideo, quod supra vulgares, atque imperitos homines plus aliquid intelligamus. Neque verò illam hic ego vitæ partem attingendam puto, quæ nondum iniecta purpura, sed luce tantummodo lucebat sua: cum sit eius conditionis ita propria moderatio, & rerum humanarum contemptio, ut quamquam dicere singularia possum, nihil tamen præ-

ter

rer modum admirabile me dicturum esse confidam. Sin-  
autem ex accessione purpure, non modo nihil cum de  
modestia, deque animi demissione, nihil de felicitatis,  
ac rerum omnium despicientia remisisse, verum etiam  
eas virtutes auctiores longè fecisse, ac meliores ostende-  
ro, aliquid sine dubio proferam in medium ab ea vitæ,  
fortunæque mutatione vehementer abhorrens. Vt enim  
hic ordo Purpuratorum illustrissimus omnis planè mode-  
rationis, omniumq; virtutum sua sanctitate sit custos;  
splendorem tamen habet eiusmodi, qui perstringat inter-  
dum virorum quoque bonorum aciem, habet tantam su-  
premo cum honore propinquitatem, ut animum alioqui  
firmum, ac stabilem possit aliquantulum eius cupiditate  
labefactare. Sed non labefactauit animum eius, qui pur-  
puram illam, hoc est honorem primo proximum tam in-  
gratis accepit, quàm alij sitienter expectant, qui taci-  
tum, & quietum plus amaret otium, quàm alij turbidam,  
inquietamq; felicitatem, qui fastigium omne dignitatis,  
& culmen finitimum putaret esse ruinæ locum. Erat iam  
Bellarminus, quamquàm ipse frequentiam fugeret, ho-  
minumq; notitiæ subduceret se, nomine celebratissimus, &  
fama. fuerat iam olim à Cardinali Borromeo sanctissi-  
mo, quem nunc aris colimus, & sacris, expetitus arden-  
ter, frustra; Mediolanum è Belgio, prouincialibus enixè  
repugnantibus, accersitus: fuerat à Sixto V. Pont. Max.  
cum Henrico Cardinali Caietano Legato difficili sane  
tempore missus in Galliam: fuerat ab alijs deinceps in-  
dubijs de religione quæstionibus sæpè consultus; à Cle-  
mente autem Octauo diligi, honorarique præter ceteros,  
ac multo maxime videbatur. Animaduertebat ipsemet  
eius in se Pontificis illustria quædam, & peculiaria bene-  
uolentiæ signa: sed vir antiqui moris, ac probitatis suspi-  
cari serò cœpit, ad Purpuratorum ordinem amplissimum.

se

se destinari . Pestem adeo sibi ratus imminere , admonet de suspitione sua communem familiæ nostræ Præsidentem , ac Rectorem in tempore , oratque vt tantum periculum à se, ac propter exemplum à tota quoque Sodalitate defendat . Dum sibi, dum publicæ rei tanto cum studio , ac sollicitudine cauet , ecce tibi qui eum nunciarent Cardinalem esse iam factum , vētarentq; domo pedem efferre ; nisi ab eius voluntate discedere vellet, cuius imperio traheretur ad purpuram . Diceres afflatum fidere pestilenti, non ingrato nuncio verberatum . latebras meditabatur , & fugam , antiqua proculdubio renouaturus exempla , nisi fuisset aliorum iudicio, atque auctoritate prohibitus . Quippe animi dubius, inopisque consilij , sapientiores Patres , & doctiores , quorum ipse in Pœnitentiario Diui Petri Collegio Præfectus erat , ac Moderator, in consultationem accitos anxie percontatur , ecquid sibi faciendum in illo temporis , ac rerum articulo censeant ; remansionem ne suadeant , an tacitam ad Pontificem abitionem , vt de suo eum dolore , & deque sacramento , quo eiusmodi vetabatur honorem capeßere, faceret in priuato colloquio certiores . Respondent ad vnum omnes, id integrum non videri , nec esse deliberationi locum, vbi præcepto tam amplo ad resistendum domi cogeretur . Abit è concilio tristis : & quoniam clausa videbat effugia , quærere molimina cœpit, certo ad Aldobrandinum Cardinalem homine dimisso, qui aditum ad Põtificem suo nomine postularet . Cũ ne iacta quidem hac anchora solum comprehenderetur, eundem fuit in cœtum, vbi ceteri Collegæ hominem opperiebantur . Antequam de more tonderetur, antequam noui ordinis indueretur vestibibus, diũ, multumq; laboratum est . Itum perfectis omnibus in cœnatione ex more, vbi gratulationes erant, velut in natalitijs epulis, & læta colloquia . solus ipse interea lugere, ac lacrymari, solus  
angi,

angi, & fortunam complorare suam, tamquam in silicernio funestorum esset, non in conuiuio Purpuratorum. Ductus deniq; cū reliquis ad Pontificem, cum sui consilij rationem atque impedimentum, quo ab honore delato prohiberetur aggressus esset exponere, indicta contumaciæ pœna, nisi desisteret, ac silere continuò iussus, ceruicem aliquando supposuit iugo, quod citra lethiferi peccati culpam detrectare non poterat. Libenter hæerem hoc loco, vbi magnanimæ contemptiois offendimus exemplum ita rarum, vt gloriari pene possimus, hoc nostro sæculo natum esse. libenter, inquam, hic immorarer, nisi virtutes hominis antiquas in hoc honoris gradu retentas, amplificatasq; nisi nouas etiam expositurus essem, quas in idonea proposuit scena, suoq; vclut in lumine collocauit.

Principio, quemadmodum in commentario legi, quem suo ipse chirographo consignatum reliquit, id apud se certissimo decreto sancitum voluit, vt pristini parsimoniam victus, piæq; consuetudinem precationis, ac ceteram viuendi rationem antiquam perpetuò retineret: deinde, vt nullos à Pontifice redditus, prouentusue peteret annuos, nulla prorsus à Principibus acciperet munera, quibus occurrantur etiam lyncei: tum, vt nullas sibi pararet opes, quibus affines, & consanguinei redderentur opulentiores. Quæ profectò quàm exaggeratè, cumulatèq; præstiterit omnia, duorum & viginti decursus annorum semper æquabilis, ac similis sui, sanctissima demum innocentis vitæ conclusio declarauit. Quod enim attinet ad diuinarum commentationem rerum, ac pias preces, numquam commisit, quin eius studij causa de nocte conurgeret, & fecit semper, vt ad veterem vsum aliquid plus temporis, & vacationis accederet: quod ad cibi, vitæq; degendæ modum; & cum priori temperantia ieiunia

iunia singulis hebdomadis terna coniunxit , & à generali Societatis nostræ Moderatore legem efflagitauit , quæ suppellectilem , familiam , instrumentum omne domesticum veluti certissima regula metiretur . De prouentibus autem quàm nihil omnino laboraret , aliàs quidem semper , sed tunc maxime demonstrauit , cum post accepti honoris initia , nullis ipse copijs instructus , debenti pensionem Episcopo non copioso remisit totam , condonauitque minime rogatus in perpetuum , & Clementi Pontifici opulentum ei , quod primo quoque tempore suppeteret sacerdotium pollicenti constanter affirmatèq; respondit , quicquid hoc esset diuitiarum , & opulentiæ alijs se libenter , vtròquè concedere : sibi sportulam , & cubiculum in ea Societate , cuius etiam tum pars esset aliqua , deesse non posse . Suscepit ille quidem aliquando Capuæ Sacerdotium , & quoniam ita iubebatur , eius ciuitatis Antistitem se passus est fieri : sed vtrum in eo quæstum pecuniæ , an animarum facere compendium vellet , ab ijs intelligite , qui totam nobis ejus muneris ineundi , procurandiq; rationem in hunc modum exposuerunt . Principem vrbs ædem , ipsamq; domum Archiepiscopi male materiata , & squalore obsitas haud mediocri sumptu primo loco refecit , nec festum vllum ire sinebat diem , quo non ipsemet in templo concionem haberet : deinde numero familiarum descripto , quarum vel angusta res esset , vel grauis inopia , singulis mensibus certa pecuniæ summa subleuabat singulas : denique , vt ne ijs quidem deesset , qui vicatim , oppidatimque stipem emendicant , iussit in ipso domus atrio , vestibuloque diribitores esse , qui petentibus aduenis quotidie cibatum , ac nummos impertirentur . Atque hoc institutum in obeunda quoque prouincia , & ditione , quam singulis omnino lustrabat annis per pagos vbique concionabundus , accuratè retinuit ,

nuit, neminem umquam passus abire vacuum ex ijs, quos aliqua premi rerum egestate cognouisset. In quo genere quoniam vnum videtur esse, quod exponi solitariè velit, ac separatim enarrari, non committam, vt temere cum ceteris inuoluatur.

Nihil in tota sui muneris administratione prius habuit, aut antiquius, quàm vt corrigeret populorum capita, sacerdotes: inter quos cum vnum offendisset alea iam infamem, & talo, nec vllis aut verbis, aut minis reuocare posset ab angiporis in templum, rogauit hominem quid esset causæ, cur tam impotenter ab aris, & sacrificio ad alueum raperetur, ac pyrgum. Respondet, rem sibi domi curtam esse, nec facile, nisi per ludum consulere posse rationibus suis. Extemplo (videte mansuetudinem ne dicam, an liberalitatem Antistitis?) extemplo numerata pecunia, omnem illi quæstum, ac lucrum aleæ repræsentauit, imperauitque, vt quoties tantundem, aut plus etiam argenti velleret, toties ad accipiendum sine rubore, ac verecundia reuerteretur. Emendatus ille confestim (quis autem ea charitate non emendaretur?) emendatus inquam, & redditus ex aleatore sacerdos, toti ciuitati miraculum fuit. Ne aliud quidem huic omni ex parte perfimile-obtegi silentio, aut negligenter, & per incuriam præteriri potest exemplum. est enim hoc etiam spectabile, non liberalitatis modo, sed etiam charitatis, ac mansuetudinis argumentum. Externus quidam, profugus, ac vagus ementito cum habitu, impuraque ad latus adiuncta, pellice sacerdos, siue casu, siue consilio delatus est Capuam. vbi deprehensus, & patefactus, qui carceres, ac tritremes expectare meritò poterat, abstractus à meretricula, poenitentia lustratus, toga demum indutus, ac pallio, reperit apud Bellarminum Antistitem eam animi salutem, ac vitæ, quam ei diuturna illa, & erratica desperatio

tio denegabat. Accipite verò nunc, non dicam proba-  
 bilis auaritiæ, cuius ille vel vacuum nomen auersabatur,  
 sed piæ cuiusdam cupiditatis, & parsimonix genus. Ve-  
 niebat cum ceteris sacerdotibus in odæum, canebatque  
 quotidie, non ea tantum gratia, vt alijs præiret exemplo,  
 verum etiam, vt quoniam Capuæ Archiepiscopus ex  
 instituto veteri Canonicus item est, sua ipse quoque diu-  
 na stipendia, quæ pauperibus elargiretur, exciperet.  
 hæc enim quia priuato illo labore, tamque studioso pa-  
 rabat incommodo, dicebat verè, proprièque se dare de  
 suo, cetera, quæ capiebantur ex sacerdotij fructibus, ex  
 alieno se dare sibi videbatur. Non possum omnia perfe-  
 qui, nec vna tantum oratione complecti, quæ per hoc be-  
 nignitatis, ac misericordiæ studium edidit opera comme-  
 moratione, monumentisque dignissima sempiternis. Dec-  
 rat iam omnis pecunia, exhaustus propè iam erat ipse li-  
 beralitatis, ac beneficentiæ fundus: non ærarium, quod  
 ei nullum vnquam fuerat, sed horrea, cellæ, promptua-  
 ria vacua iam erant, & inania. neque enim ille cibaria,  
 non vestem, non culcitram, non pallia superesse domi  
 patiebatur. Reclamare omnes œconomi, & rei familiaris  
 administri monere seriò, ne viatici quidem aliquid reli-  
 quum esse ad habendum in Urbem iter, cuius, extincto  
 Clemente Pontifice, propter futura comitia necessitas im-  
 pendeat: cum ille interea id solum ad ea monita respon-  
 dere satis haberet, auersari se superuacaneam secururæ  
 dici providentiam, nec sibi quicquam odiosius esse, quàm  
 quæ veritatis oraculo damnaretur, de futuro, ac de cra-  
 stino cogitationem. Et quoniam hoc Christi Seruatoris  
 effatum firmissimè consignauerat animo, eam perpetuò  
 retinuit ad obitum vsque consuetudinem, ac disciplinam,  
 vt Calendis Ianuarij, cum accepti, datique consulisset  
 ephemeridas, erogari continuò iuberet quicquid ex anno  
 priori

priori superesset. Neque enim eum annum auspicari se-  
 ritè credebatur, qui domum suam omni spoliata viuenti  
 presidio non inueniret. Et dubitabimus, vtrum illud quo-  
 que promissum exsoluerit, quod tertio loco tum fecit, cum  
 Ratium inter Amplissimos Patres adlectus, secum ipse, ac  
 Deo teste sibi proposuit, nullas se collecturum opes, qui-  
 bus agnatos, ac posteros opimaret? O testamentum illud  
 tuum, Bellarmine, pulcherrimæ testimonium temperantiæ,  
 ac paupertatis. Vultis hic ego resignem tabulas, quas  
 decimo circiter ab hinc anno confecerat, & supremam  
 hominis innocentissimi voluntatem, assemque pronun-  
 ciam totum? *Corpus meum*, inquit, *offerri iubeo sine de-*  
*signatoribus, & pompa; nec in edito lecto, sed in humili,*  
*vulgarique feretro collocari volo, nullis ornatum insignibus,*  
*aut statellis.* Non potuit huic obtemperari mandato, quia  
 Pontifici Maximo visum est aliter: sed profectò quemad-  
 modum imperarat, faciendum necessariò sic fuisset, nisi  
 eius heredes inopiæ, qui domus huiusce fuerunt Patres,  
 tum ad alia multa, tum ad hæc etiam iusta peragenda non  
 nihil ex corrogata stipe contulissent. *Ad expiationem*  
*animæ meæ nullam ego designo, legoque pecuniam, cui co-*  
*gende, cumulandæ nullis umquam temporibus operam*  
*dedi: sed spero, scioque mihi non defuturam parentem, al-*  
*tricemque meam Sodalitatem illam, cuius ego defunctis so-*  
*cijis pro mea virili parte non defui. Fratri meo,* (erat  
 enim tum superstes) huic autem fratri suo quid expecta-  
 tis, aut opinamini relicturum esse? apud argentarios, &  
 redemptores pecuniam? domi signa marmorca, vel au-  
 ream vestem? foris oppida, vel latifundia? ò alienissima  
 Bellarmini à communi mortalium cogitatione consilia.  
*Fratri meo reddi volo pictam in tabula Othaus Clementis*  
*effigiem, hæc est tota legati summa, hoc fraternæ monu-*  
*mentum opulentia, tam parui restitutio commodati. An-*  
*gelo*



*gelo nepoti meo* (viuebat hic etiam, cum testamentum conderetur) *dari iubeo piſtas tabulas duas, alteram Roberti Cardinalis de Nobilibus, alteram Diui Caroli Borromei, & argenteam crucem Sanctorum diſtinctam, ornatamq; reliquijs, quam è collo penſilem gerere mihi mos eſt.* Ne huic quidem, aut ceteris aliquid amplius testamento relinquit. Superſunt enim alij ex paterno, maternoq; genere probæ indolis adoleſcentes, quos indonatos propter inopiam eſſe permittit, nec aliqua parte huius, quæ nulla propemodum eſt, hæreditatis aſpergit. Sed ire finite iuuenes optimi, quæ fortunæ rapit iniquitas, & inconstantia. magna vobis à patruo, auunculoque veſtro traditur, & legatur hæreditas, qui tanta cum omnium in ſe beneuolentia vixit, tanta cum gloria deceſſit è viujs. Vidiftis quanto ſenſu diligeretur ab omnibus, quanta mortalium omnium commendatione celebraretur: vidiftis in morbo ſupremo ad eum ſingulari cum amoris ſignificatione Pontificem: vidiftis ad eius genua primarios accidentes viros, manum exoſculantes, aliquid religionis cauſa depoſcentes ex ijs, quæ ille vel uſu tractaret, vel gereret corpore: vidiftis denique illo demortuo, totius in hoc templum Urbis Romæ concurſum, vndamq; populi, militum perrumpentis cuſtodiam, & corpus, aut lectum manu contingere geſtientis. Huius vos amoris, & gloriæ ab eo, ſi neſcitis, abſque testamento, & ſyngrapha ſcripti eſtis hæredes: in huius vos aſſis, & patrimoniij partem venitis: quam, ſi ſapitis, Attalij conditionibus anteferre debetis. Quemadmodum enim improbi parentes nullam perniciem, peſtemq; creant maiorem liberis ſuis, quàm cum odium ſibi conſtant, & maleuolentiam popularem, ſic innocentes, & boni maiores nullam tradunt poſteris opulentioſiorem hæreditatem, quàm cum Principum ſibi demerentur amorem, & beneuolentiam ciuium. Hæc videlicet opes

opes ipsi vos ab illa paupertate decerpatis . demonstrabimini prætereuntium digito : relegetur in ore vestro Cardinalis optimi dignitas , & maiestas , diligitur in indole virtus , ac sanctitas , ipsa demum in vos , nisi degeneres esse volueritis , honoratissimi patrui promerita redundabunt .

Ceterum iniuria virtutum sit , in eo magnopere diuitiarum , opumque contemptum admirari , quem excellentiora bona quadam , & potiora , hoc est summum honorem in terris , ac vitam ipsam scimus incredibili magnanimitate neglexisse . Dixi de honoris despicientia sane multum , cum demonstraui , quanto cum sensu , ac dolore se passus est inter Purpuratos adscribi ; sed dicenda sunt ampliora . Neque enim ex eorum numero Bellarminus fuit , qui cum honores ingratis acceperint , in acceptis deinde , quæ humanæ mentis est inconstantia , sibi placere paulatim incipiunt , & maiores vehementius expetere , quàm minores ante repudiassent . Non hanc ille morum dissimilitudinem , ac varietatem vnquam ostendit : sed eodem vultu semper honorem intuitus , quo cum olim repugnanter accepisset , auditus est aliquando cum diceret , sibi videri flammæ aspicere suo corpori circumfusas , cum se mitra indutum , & purpura contempleretur : Quin à probatissimis ego testibus accepi , atq; ab ijs ipsis , quibus cum animi sui consilia communicauit , sedulo de se abdicando , deponendaq; purpura deliberasse ; nec ante destitisse , quàm intelligeret , splendide sane , atq; ad aucupandam sanctimoniam famam appositè , sed frustra , cassoque conatu id se petiturum , quod ne Petro quidem Damiani prorsus , omniq; concessum fuisset ex parte . Tanta quippe dignitas , ac sanctitas huius purpuræ putatur esse , vt inter res illas euanidas , ac fluxas , quibus ad seuerioris vitæ rationem quærendam remitti nuncius à pijs , ac religiosis homi-

hominibus solet, numerari non posse videatur. Quæ profe-  
ctò causa Cardinales olim impulit, ut cum Ardicinus se-  
cundus à Porta, ordine hoc amplissimo relicto, digressus es-  
set ad Monachos, ab Innocentio Pont. VIII. qui eam illi  
veniam inuitus dederat, ut reuocaretur in Collegiũ, quo-  
tidianis & precibus, & querimonijs efflagitarint.

Vnus tamen est in hoc honorum curriculo scopulus,  
quem paucissimi præternauigant, vnum illicium est, quo  
etiam callidi capiuntur, ac boni; vltimus ille nimirum  
gradus, & suprema potestas, qua partibus explentur om-  
nibus ipsa vota mortalium. quippe animus etiam mode-  
ratus, ac temperans causas sibi videtur habere probabiles,  
cur apicem illum exoptet, in quo grauissimi Patres, & pri-  
ma illa sanctitatis antiquæ lumina prolapsionem, casumq;  
reformidarunt. Sed hic scopulus, & breuia, hæ tam  
artificiosæ periculi latentis illecebræ illum fallere non po-  
tuerunt, qui & curiosè discrimina perpenderet omnia, &  
nihil in humanis, nisi quod est humile, tutum putaret, &  
nominatim ab illo culmine sibi timeret tamquam à saxo  
nafragijs opportuno. Pronunciabat enim definiendo,  
idque crebris vsurpare sermonibus solitus erat, Pontifi-  
cium munus laborem periculosissimum, ac periculum la-  
boriosissimum esse. Et quia circumspecti, ac suspiciosi  
gubernatoris est, etiam ea, quæ non eueniunt, sed tamen  
accidere possunt, animo secum ante peragere, dixit ali-  
quando, gaudere se, quòd qui ad purpuræ dignitatem  
ineuitabili præceptione fuisset, ac necessitate compulsus,  
ad supremum Ecclesiæ Sacerdotium adigi non posset im-  
perio; cum tantum præcipiendi ius in interregno quemad-  
modum existimabat ipse, sit nemini. Sic enim paratus  
erat ad id quoque muneris, honorisque repudiandum,  
ut putaret, Cardinalium suffragatione omnium, ac volun-  
tate se cogi non posse; in ea tantum opinione decipi se  
passus,

passus, & monitorem, quem etiam audiuit, hoc vno loco requirens, qui scriptis, ac doctrina totum terrarum orbem instituisset. Cum hac ergo preparatione, munimentoque Conclauē primum ingressus, cum officij causa Patres Amplissimos, vt occasio se se dabat, alloqueretur, & saluaret aliquos, admonebat, ne sibi clauum Ecclesiæ traderent, qui genus duceret à maioribus ætate longæuis, ac viuacissimis: periculum subesse, ne Pontificem viderent nonagenarium. Alius hæc in aliquorum pectus descendere poterant, quàm quæ faceret dicuntur, & commodè. tanta tum quippe res agitur, vt nulla prorsus vrbinitas omni vacare periculo queat. Sed tamen ipse loquebatur ex animo, & per iocum illum à deliberatione, si qua foret, serio Patres detertere voluisset, quemadmodum dictis disertissimis, ac re postea significauit. Nam & precibus à Deo inter Comitia contendebat assiduus, vt se à tam edito fastigio procul auerteret; & cum Cardinalis quidam, grauitate, doctrina, religione spectatissimus ei diceret, in illo Conclauē, agi de ipso iam coeptum ad Pontificatum euehendo, suamque propterea in opus tam salutare diligentiam, studiumque deferret, non modo nullis hominem persecutus est gratijs, verum etiam enixè rogauit, ne, si saluum se cuperet, quicquam eiusmodi, sed alia omnia moliretur. quin articulatim, ac distinctè subiunxit, se profectò Principatum illum abnuere, & sic esse paratum, vt ne stipulam quidem, quæ tum fortè iacebat humi, ad eum consequendum honorem tollere loco vellet, aut commouere. Sed numquam in eo clarior apparuit huiusce neglectus Imperij, quàm cū suo quodā munere persunctus, quod Præfectos aliquos offendifset Regios, & potentes & magnos; admonitusque à familiari per litteras, vt videret etiam, atque etiam, ne quid ageret suis aliquando rationibus obsuturum, habere

bere se gratiam amico pro benevolentiae significatione respondit, verumtamen ipso Sacerdotij principatu, ad cuius adaptionem sui functionem muneris impedimento futuram intelligeret interpretando, nihil omnino se commoueri; immo disertè se Pontificem esse nolle. si quid grauius minis illis intentaretur, Marcelli Ceruini se nepotem esse minime degenerem. qui cum Cardinalis esset, Tridentum à Romano Pontifice ad cogendum, regendumque Concilium allegatus, ne proposita quidem à Casarianis acerbissima nece deterreri potuit, aut impediri, quo minus officio satisfaceret suo, idque perficeret, quod ab omnium Imperatore Deo sibi demandatum esse intelligebat.

Commodum in hoc exemplum incidimus, quod non honoris tantummodo contemptionem habet, sed etiam corporis, ac vitae. Demonstraturus enim extremo loco sum, ipsam quoque vitam à Bellarmino fuisse neglectam, ac pro nihilo ductam; ne quid restaret, quod ille infra se positum habere non videretur. Viro sapienti, ac bono dolorem condonat Aristoteles de vitae iactura, sensumque in ipso periculo mortis acerbiorē: quia cum illi vita sit proba, cunctisque virtutibus instructa, omnium intelligit maximè cum moritur, quanto, & quàm excellenti bono spoliatur. Sed necesse non habuit istam ab Aristotele veniam accipere Bellarminus, qui maiori cupiditate flagrabat interrompendae vitae, quàm alij producendae. Intellectum id quidem semper est, sed tum praesertim, ac maximè, cum in morbo, qui fuit illi postremus, siue caloris, aestusque vi aliquantulum aberraret interdum à mente, siue remittente flagrantia, sanitate vteretur integra, nullae ab eo voces emittebantur aliae, nisi quae vehementer è vitae statione decessum esflagitarent. Nemini, qui suas ei preces apud Caelestes offerret, non respondit, qui se

se bonique facere tam pium officium, sed tamen id vnum excipere, ne sibi vitam à Deo poscerent, quam funditus ipse repudiaret, ac nollet. Quin ab ipso Pontifice Optimo, ac Maximo suum ei studium inter aras, ac sacra pollicente, illa legē, consilioque tam amplum se munus accipere velle professus est, vt maturius, ac citius è corporis vinculis auelaret in cælum, non vt ex eo mortis periculo liberaretur. Fuit ille quidem in tota valetudinis regendæ ratione facillimus, nec vñquam grauius inter corporis acerbitates, ac dolores est questus. sed vnus tamen eius aliquando gemitus exauditus est, & expositulatio non leuis, cum septima post decubitum die habere se meliuscule intellexit ex medicis, qua die domum se suam, (sic enim ipse cælum appellabat) commigraturum esse pro certo sperauerat. Illuxit denique tempus exoptatum, cum admonitus, exiguum sibi vitæ spatium superesse, contineri non potuit, quin in summa illa confecti, afflictiq; corporis imbecillitate penè semiuivus, atq; intermortuus ter ingenti, claraque voce, ò bonum nuncium exclamaret. Ne multa. commeatum, ac viaticum peregrinationi deposcit idoneum: quod cum humi stratus, & sic in genua quemadmodum poterat innixus excepisset, iterum lecto compositus, inter iucundissimas de caelesti patria collocuriones, ac preces horam præstolabatur extremam. quæ cum aliquando tandem aduisset, crucem extemplo complexus arctissime, ac velut illa comite facturus iter, humeris, colloq; leniter acclinans, haud multo post sine laterum vexatione, sine spiritus angore, sine deprauatione vultus, & corporis, mortalitatem expleuit in terris, immortalitatem inter Calites inchoauit. vir omnino dignus, qui octogesimo circiter ætatis anno decedens, tamquam acerbo præriperetur obitu, sic omnium ordinum vocibus, & luctu conploraretur. Populare prouerbium

uerbium est, bouem vetulum non lugeri, in homines bene senes, & grandiores ætate conueniens; quorum excessus quia tempestiuus esse videtur omnibus, amicorum luctu vacat, & comploratione domesticorum. sed hoc dictum alioqui verum, & diuturno comprobatum experimento in Bellarmini funereprehendimus falsum, qui & tam senex ploratus ab omnibus est, & si ad plures quoque prouectus fuisset annos, semper existimatus fuisset immature decedere. Nimirum, vt vetus quidam poëta loquitur,

Consules fiunt quotannis, & noui Proconsules.

Sed (non dicam equidem quod apud eundem sequitur,

Solus, aut Rex, aut poëta non quotannis nascitur.

Rex enim quotidie nascitur ex Regibus, & poëtarum, natio plus etiam quàm vellemus, in Republica sobolescit) sed dicam inquani id quod ipsa res est, nec in idonea laude verebor inuidiam. Solus Bellarmino similis ordinis amplissimi Senator, ita doctus, ac sapiens, ita modestus, ac moderatus, ita religiosus, ac pius, ita Reipublicæ salutaris, non modo non quotannis nascitur, sed requiretur in annos plurimos, & longa post sæcula desiderabitur. Nō tamen eius à nobis vmquam desiderabitur auxilium, non fides, non Ecclesiæ patrociniū, ac tutela; cuius militantis ipse, dum viueret, tam præclara stipendia meruit, cuius ouantis, vita iam functus, & triumphum capit, & obtinet gloriam. Excurrit ille nunc inter felices animas, Ambrosios, Augustinos, aliosque mortis beneficio triumphantes, ac liberos: respicit è cælo relicta, videt nos alta nocte circumdatos, & diuinis perfusam radijs aciem promittit in spatia tam vasta terrarum. Suas adeo partes intelligit esse, pro Christiana Republica non iam amplius columbæ genitum dare, quod scripto libello fecit in lugentium campis, sed per aduocationem, adesse,

adesse, atque intercedere; quod & præstitit olim vivens  
 in terris, & nunc præstare multo facillimè  
 potest in triumphantium concilio  
 collocatus.

